



Hapo zamani za kale,  
wasichana watatu  
walienda kutafuta  
kuni.



Ilikuwa siku yenye joto  
kwa hivyo walienda  
mtoni kuogelea.  
Walicheza  
wakirushiana maji na  
kuogelea.



Ghafla, waligundua  
kuwa saa zilikuwa  
zimeenda.  
Waliharakisha kurudi  
kijijini.





Walipokuwa karibu nyumbani, Nozibele aliweka mkono wake shingoni. Alikuwa amesahau mkufu wake! “Tafadhali rudini nami!” aliwasihi marafiki zake. Lakini, marafiki zake walisema kwamba saa zilikuwa zimeenda sana.



Kwa hivyo Nozibele alirudi mtoni pekeyake. Aliupata mkufu wake nakuharakisha kurudi nyumbani. Lakini, alipotea gizani.





Kwa umbali aliona  
mwangaza ukitokezea  
chumbani.  
Aliharakisha kuelekea  
chumba hicho na  
kubisha hodi  
mlangoni.



La kushangaza ni kuwa mbwa ndiye aliufungua mlango na kusema, “Unataka nini?” “Nimepotea, nahitaji mahali pa kulala,” Nozibele alisema. “Ingia ndani, au nikuume!” mbwa akajibu. Nozibele aliingia.



Kisha mbwa akasema,  
“Nipikie chakula!”  
“Lakini sijawahi  
kumpikia mbwa  
chakula,” Nozibele  
aljibu. “Pika, au  
nikuume!” mbwa  
akasema. Nozibele  
alimpikia mbwa  
chakula.





Kisha mbwa akasema,  
“Nitayarishie kitanda.”  
Nozibele akajibu,  
“Sijawahi  
kumtayarishia mbwa  
kitanda.” “Tayarisha  
au nikuume!” mbwa  
alisema. Nozibele  
alitayarisha kitanda.



Alitakiwa kumpikia,  
kumfagilia na  
kumwoshea mbwa kila  
siku. Kisha siku moja  
mbwa alisema,  
“Nozibele, leo  
nalazimika  
kuwatembelea  
marafiki zangu. Fagia  
nyumba, pika chakula  
na uoshe vitu vyangu  
kabla sizarudi.”





Mbwa alipoenda tu,  
Nozibele alichukua  
nywele tatu kutoka  
kichwani kwake.  
Aliweka mmoja  
mvunguni mwa  
kitanda, mwingine  
nyuma ya mlango, na  
mwingine kwenye zizi  
la ng'ombe.  
Kisha alikimbia  
kwenda nyumbani  
haraka alivyoweza.





Mbwa aliporudi, alimtafuta Nozibele. “Nozibele, uko wapi?” Aliita kwa sauti. “Niko hapa mvunguni mwa kitanda,” unywele wa kwanza ulisema. “Niko hapa nyuma ya mlango,” unywele wa pili ukasema. “Niko hapa ndani kwenye zizi la ng'ombe,” ukasema unywele wa tatu.



Papo hapo mbwa alifahamu kuwa Nozibele alikuwa amemdanganya. Kwa hivyo, alikimbia moja kwa moja hadi kijijini. Lakini, ndugu zake Nozibele walikuwa wamemsubiri kwa fimbo kubwa. Mbwa aligeuka na kukimbia na hadi leo, hajawahi kuonekana tena.







